



Broj: 05-05-32240/17 RA
Sarajevo, 11.01.2018. godine

SKUPŠTINA KANTONA SARAJEVO
- o v d j e -

n/r prof. Ana Babić, predsjedateljica

PREDMET: Dostava odgovora na zastupnička pitanja – zastupnik Edin Forto

Zastupnik u Skupštini Kantona Sarajevo, Edin Forto, na 35. Radnoj sjednici Skupštine Kantona Sarajevo, održanoj dana 15.11.2017. godine, u okviru tačke Dnevnog reda "Zastupnička pitanja, inicijative i odgovori", u skladu sa Poslovníkom Skupštine Kantona Sarajevo, postavio je zastupnička pitanja, kako slijedi:

"Koliko bespovratnih sredstava je vaše ministarstvo povuklo za sprovođenje KEAP-a od prvobitno usvojenog plana iz 2004. do danas, te na koje tačno projekte su uložena sredstva? Također, možete li nam dostaviti spisak imena članova tima, koji radi na pripremi projekata iz KEAP-a usvojenog 31.10.2017. za narednih pet godina, a u svrhu povlačenja bespovratnih sredstava uz pomoć kojih će KEAP biti implementiran?"

ODGOVOR:

Programi Evropske unije su jedan od instrumenata koji EU koristi u cilju podrške i jačanja saradnje između zemalja članica s jedne strane, te potencijalnih i zemalja kandidata sa druge strane u raznim oblastima provođenja evropskih politika. Učešće u programima EU predstavlja priliku za upoznavanje sa njenim politikama, evropskim institucijama, zakonima i praktičnoj primjeni istih, kao i sa sistemima vrijednosti i mehanizmima funkcionisanja. Jedan od najsveobuhvatnijih oblika finansijske podrške Evropske Unije svakako je Instrument predpristupne pomoći (IPA), čiji je korisnik sredstava bio i Kanton Sarajevo. Zemlje kandidati i potencijalni kandidati za pristupanje EU, za povlačenje sredstava potrebno je da usvoje realne dugoročne državne strategije za postepeno i efektivno usklađivanje svog zakonodavstva sa pravnom stečevinom EU. Kada je u pitanju okoliš, u toku 2017. godine Vijeće ministara BiH je, na prijedlog Ministarstva vanjske trgovine i ekonomskih odnosa, usvojilo Strategiju zaštite okoliša, odnosno aproksimaciju ili prilagođavanje propisa pravnoj stečevini Evropske unije u oblasti zaštite okoliša Bosne i Hercegovine (EAS BiH). Aproksimacija propisa u oblasti zaštite okoliša u BiH se sastoji od četiri strateško-planska dokumenta, i to državnog primjenjivog na cijeloj teritoriji zemlje, te entitetskih i Brčko Distrikta BiH, a koji su rađeni zajedno i paralelno kako bi se postigla njihova maksimalna usklađenost. Pravna stečevina EU u oblasti zaštite okoliša, sadržana u ovim strateškim dokumentima, sastoji se od osam grupa zakonodavnih instrumenata: horizontalni, voda, otpad, kvalitet zraka i klimatske promjene, industrijsko zagađenje, hemikalije, zaštita prirode, te buka u okolišu.



Inače, proces pridruživanja i pristupanja EU iz perspektive pravnih sistema u BiH predstavlja složen proces koji se sastoji od tri međusobno povezana segmenta: transpozicije pravne stečevine EU u oblasti zaštite okoliša u pravne sisteme BiH, entiteta i Brčko distrikta, zatim provedbe propisa koji prenose pravnu stečevinu EU u oblasti zaštite okoliša (što uključuje uspostavu institucionalnog okvira na nivou države, entiteta i BD BiH, sposobnog da u praksi provede novu zakonsku regulativu usklađenu sa zakonima EU), te na kraju i stvaranje izvršnih mehanizama (na svim administrativnim nivoima) putem kojih će se osigurati adekvatno ponašanje svih subjekata i poštovanje novih propisa, korištenjem nadzornog sistema i kaznenih i podsticajnih mjera.

Usvajanjem ranije pomenutog strateškog dokumenta Bosni i Hercegovini, a samim tim i Kantonu Sarajevo, otvorena je mogućnost za korištenje sredstava iz instrumenta Predpristupne pomoći IPA II 2018-2020. Visina sredstava samo za 2018. godinu iznosi cca 20 miliona €. Međutim, preduslov i osnova za dobijanje IPA pomoći jest da država ima pripremljen Sektorski planski dokument u oblasti zaštite okoliša, koji daje, između ostalog, analizu spremnosti sektora za uvođenje sektorskog pristupa u okviru IPA II, kao i pregled intervencija i aktivnosti koje je potrebno realizovati u višegodišnjem vremenskom periodu koji dokument pokriva i koje se predlažu za finansiranje, a u izradi ovog dokumenta učestvuju resorno državno ministarstvo i sektorska radna grupa. U tom smislu, za rad u Sektorskoj radnoj grupi za okoliš i vodne resurse u okviru Odbora za IPA II, Vlada Kantona Sarajevo je sredinom decembra 2017. godine imenovala predstavnike ispred Kantona. Očekivanja su, da će do aprila tekuće godine biti izrađen Sektorski planski dokument, a u njegovoj pripremi insistirat će se na realizaciji prioritarnih mjera i aktivnosti koje su definisane kroz pojedinačne akcione planove u okviru Kantonalnog plana zaštite okoliša Kantona Sarajevo.

S druge strane, kada je u pitanju period prije donošenja pomenute državne strategije, ističemo da je Kanton Sarajevo odnosno ovo Ministarstvo (najčešće kao pridruženi partner) u saradnji sa drugim kantonalnim institucijama i nevladinim organizacijama, povuklo značajna bespovratna sredstva za projekte iz oblasti zaštite okoliša, kako u okviru Programa predpristupne pomoći tako i od drugih oblika međunarodne saradnje. U tom kontekstu, izdvajaju se slijedeći projekti:

1. Postrojenje za prečišćavanje otpadnih voda Butila - grant sredstva EU 13 miliona €

Rekonstrukcija postrojenja za tretman otpadnih voda Butila KEAP-om je registrovana kao prioritet iz oblasti zaštite voda. Ministarstvo prostornog uređenja i zaštite okoliša Kantona Sarajevo zajedno sa preduzećem KJKP „Vodovod i kanalizacija“, bilo je je nosilac aktivnosti na obnovi postrojenja. Vlada Kantona Sarajevo je 26.07.2007. godine donijela zaključak broj 02-05-19990-11.14/07, kojim je KJKP „Vodovod i kanalizacija“ zaduženo za realizaciju aktivnosti na pripremi projektne dokumentacije za rekonstrukciju postrojenja. U periodu od 2007. godine do 2009. godine u potpunosti su realizirane predviđene aktivnosti. Iz razloga nedostatka finansijskih sredstava, nije bilo moguće realizirati ni jednu aktivnost na samom izvođenju radova, te se pristupilo intenzivnim aktivnostima na obezbjeđenju istih. Putem Ministarstva vanjske trgovine i ekonomskih poslova, uz aplikaciju Sektora zaštite okoliša Ministarstva prostornog uređenja i zaštite okoliša, 2009. godine odobrena su sredstva u iznosu od **8 miliona € iz IPA fonda EU za 2010. godinu** Skupština Kantona Sarajevo je na sjednici održanoj 30.06.2010. godine donijela Odluku o zaduženju Kantona Sarajevo za kredit Međunarodne banke za obnovu i razvoj (IBRD) za Projekat otpadnih voda u Sarajevu na iznos od 23.600.000 €. Sporazum o zajmu u visini 23.6 miliona €, između Bosne i Hercegovine i Svjetske banke – Međunarodne banke za obnovu i razvoj – IBRD za Projekat „Otpadne vode Sarajeva“, zaključen je dana 17.03.2010. godine. Projekat otpadnih voda sadržavao



je, pored rekonstrukcije postrojenja, i rekonstrukciju kanalizacione mreže. Uz pomoć Svjetske banke aplicirano je za IPA 2011 i odobrena su dodatna 2,5 miliona € Naknadno su neutrošena sredstva IPA 2010 II dio u iznosu od 2,5 miliona € alocirana na Butila, tako da su ukupno odobrena sredstva u iznosu od 13 miliona € Znači, struktura obezbijedenih sredstava izgledala je ovako: Zajam Svjetske banke 18.40 miliona € (ostatak nakon rekonstrukcije kanalizacione mreže); Grant sredstva EU 12.10 miliona € (odbijena provizija Banke) i domaće učešće 1.25 miliona €. Imajući u vidu promjene u organizaciji i djelokrugu organa uprave i upravnih organizacija u Kantonu Sarajevo, nadležnosti za realizaciju projekta su u 2015. godini prenesene na Ministarstvo komunalne privrede i infrastrukture. Iz sredstava Svjetske banke u 2017. godini finansirana je i Studija izvodljivosti za tretman i odlaganje mulja sa postrojenja Butila, koja je ponudila tehnička rješenja (alternative) konačnog tretmana i odlaganja mulja.

2. Regionalni centar za upravljanje otpadom (RCUO) Smiljevići – CARDS EU 2006 (560.000 KM)

KJKP „Rad“ je 2004.godine započeo sa pilot projektima uvođenja selektivnog prikupljanja otpada, postavljanjem 560 posuda za selektivno prikupljanje otpada i angažovanjem specijalnog vozila za selektivno prikupljanje otpada i dva mala otvorena vozila za prikupljanje papira i kartona. Izdvajanje papira, kartona, PET ambalaže i najlonske folije iz ukupne količine komunalnog otpada koji se odlaže na deponiji intenzivirano je početkom 2007.godine, kada je puštena u rad sortirnica za odvajanje i presovanje otpada na deponiji Smiljevići. Oprema instalirana u sortirnici je donacija Evropske unije kroz CARDS projekat podrške reciklaži otpada u BiH, za koju je Evropska komisija izdvojila 560.000,00 KM, dok je izgradnja objekta, te nabavka dijela opreme finansirana od strane KJKP «Rad» i Kantona Sarajevo – Ministarstva prostornog uređenja i zaštite okoliša. Sortirnica je puštena u rad 25.01.2007.godine.

3. Regionalni centar za upravljanje otpadom (RCUO) Smiljevići - IPA 2011 (1,5 milion €)

Pretvaranje odlagališta «Smiljevići» u savremeni Centar za upravljanje otpadom, u skladu je sa Federalnom strategijom i Zakonom o upravljanju otpadom F BiH, planirano je i Kantonalnim planom zaštite okoliša (KEAP). Osim sanitarne deponije komunalnog otpada, predviđeno je da u okviru Centra budu deponija inertnog materijala, pogon za reciklažu građevinskog otpada i reciklažno dvorište. U funkciji provedbe projekata obezbijedena je projektna dokumentacija i izvršen je otkup prioritarnih parcela za proširenje deponije. Ministarstvo prostornog uređenja i zaštite okoliša je putem Ministarstva vanjske trgovine i ekonomskih odnosa, apliciralo za IPA sredstva za ovu namjenu. U okviru IPA fonda za 2011. godinu odobrena su sredstva u iznosu od 1,5 miliona € za projekat „Proširenje sanitarne deponije Smiljevići“. Dana 31.12.2013. godine Delegacija EU u BiH potpisala je sa Svjetskom bankom Sporazum o projektu podrške rehabilitaciji sanitarnih deponija iz Prepristupnog programa IPA 2011. godine, među kojima je i deponija «Smiljevići» Sarajevo. Tenderske procedure su provedene u 2014. godini, a ugovaranje je, zbog kašnjenja sredstava, realizovano do kraja 2016. godine. U okviru projekta realizovane su slijedeće aktivnosti: izgradnja odlagališne plohe 15.000 m² na centralnom dijelu odlagališta, dio aktivnosti na izgradnji deponije inertnog materijala za 50.000 t godišnje sa plohom za tretman građevinskog otpada, izgradnja nadstrešnice za sortirani materijal uz sortirnicu, te nabavka elektronske mosne vage, buldožera, priključka za bale i postrojenje sa presom za baliranje.

4. Oprema za automatsko mjerenje kvaliteta zraka u Kantonu Sarajevo

U funkciji uspostavljanja savremenijeg monitoringa kvaliteta zraka u Kantonu Sarajevo, 2007. godine Ministarstvo za okoliš, prirodu i vode Vlade Pokrajine Koruške (Republika Austrija)



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029, Fax: + 387 (0) 33 562-031
Sarajevo, Reisa Džemaludina Čauševića 1



doniralo je opremu za automatsko mjerenje kvaliteta zraka u Kantonu Sarajevo, koja se odnosila na prvu mobilnu stanicu za mjerenje sa zadatkom prikupljanja podataka o stanju kvaliteta zraka. Od ovog perioda uslijedilo je širenje mreže monitoringa zraka na još tri lokacije, tako da danas imamo ukupno četiri kantonalne stanice za mjerenje kvaliteta zraka.

5. Deminiranje ugroženih površina u okviru Zaštićenog pejzaža "Bijambare" i Spomenika prirode "Vrelo Bosne" (2005. i 2006. godina)

Ministarstvo prostornog uređenja i zaštite okoliša KS i Međunarodni fond za deminiranje i pomoć žrtvama mina potpisali su 2005. godine Memorandum o razumijevanju, na osnovu kojeg su obezbjeđena sredstva za deminiranje ZP "Bijambare" u iznosu od 300.000,00 KM. Od pomenutog iznosa, oko 160.000,00 KM je obezbijeđeno od strane Vlade SAD-a putem pomenutog Međunarodnog fonda, dok je ostatak finansirao Kanton Sarajevo. U okviru ZP "Bijambare" površina ugroženog prostora je iznosila 266.000 m².

S obzirom na pozitivne rezultate na realizaciji projekta deminiranja lokaliteta ZP "Bijambare", iskazana je spremnost Međunarodnog fonda i ovog Ministarstva za udruživanje sredstava po istom principu i u okviru SP "Vrelo Bosne". S tim u vezi, realizovana su dva projekta deminiranja, a ukupno rizična površina iznosila je 230.000 m² i bila je podijeljena u pet cjelina prema projektima BH MAC-a. Od pet pripremljenih projekata 2006. godine prvo su realizovane aktivnosti na deminiranju dva iz sredstava Vlade Kraljevine Belgije i Norveške narodne pomoći u iznosu od cca 156.000,00 KM. Drugi projekat odnosio se na deminiranje područja oko naselja Vrutci, za što su obezbjeđena od strane Američke vlade sredstva u iznosu od 240.000,00 KM, dok je Kanton Sarajevo za ovu namjenu izdvojio 170.000,00 KM.

6. "Izgradnja turističkog kompleksa Bijambare – Prva faza" (2006. godina)

Projekat je odobren u okviru poziva za davanje ponuda (prijedloga) razvojnih projekata koji je raspisala Delegacija Evropske komisije u BiH kroz Program CARDS 2004. Ukupna vrijednost odobrenog granta EU za realizaciju projekta iznosila je 311.688,00 KM, dok je ovo Ministarstvo učestvovalo sa 34.632,00 KM. Projektom je realizovano niz aktivnosti u funkciji promocije ZP i podizanja turističke pristupačnosti i privlačnosti područja Bijambara, a naročito Srednje pećine kao glavne atrakcije prostora. Projekat je uključio realizaciju slijedećih aktivnosti: speleološka istraživanja sedam pećina i izradu karata, nabavku i instalisanje opreme za mjerenje kvaliteta zraka, provođenje konkursa i izbor grafičkog simbola (loga) Zaštićenog pejzaža, pripremu informativnog materijala (brošure, knjižice, promotivni film), sanaciju unutrašnjih staza i ugradnju nove rasvjete, uspostavljanje vanjskih staza i ulaza u pećinu, izgradnju parkinga, info punkta, mokrih čvorova i dr.

7. Održivo upravljanje zaštićenim područjem Vrelo Bosne (2005. i 2006. godina)

Realizacija projekta Ministarstva i Centra za okolišno održivi razvoj (COOR) pod nazivom "Održivo upravljanje zaštićenim područjem Vrelo Bosne" odobrena je kroz CARDS program Delegacije Evropske komisije u BiH na temu "Nacionalni program Okoliš i prirodni resursi – Podrška aktivnosti civilnog društva na području okoliša". U tu svrhu, odobrena su bespovratna sredstva u iznosu od 129.917,50 KM, dok je Ministarstvo obezbijedilo 14.700,00 KM. Partneri u realizaciji projekta, čiji je ključni nosilac bio COOR, bili su i stručni konsultanti iz slovenačke firme OIKOS, koji su prenijeli bogata iskustva iz Slovenije u održivom upravljanju zaštićenih područja. Upravo je projekat rezultirao izradom Plana upravljanja SP "Vrelo Bosne", koga je usvojila Vlada KS. Pored navedenog, projekat je obuhvatio i mnoge druge značajne aktivnosti s primarnim ciljem uključivanja svih zainteresovanih subjekata i lokalne zajednice u proces planiranja i upravljanja zaštićenim područjem.



8. „Zeleni se menadžment zaštićenih područja u prekograničnoj regiji Srbije i Bosne i Hercegovine“ (2010. – 2011. godina)

Projekat je odobren u okviru IPA prekogranične saradnje Srbije i BiH, te se radi o prvom projektu prekogranične saradnje Kantona Sarajevo u oblasti zaštite prirode sa partnerima iz Srbije, a koji je podržan i od strane Evropske komisije u BiH. Glavni cilj projekta bio je jačanje uloge nevladinih organizacije u integriranom upravljanju i razvoju (eko)turizma u zaštićenim prirodnim područjima Srbije i Bosne i Hercegovine, koji može podstaći ukupan lokalni, regionalni, ekonomski i društveni razvoj. Implementatori projekta iz Bosne i Hercegovine, pored Ministarstva, su bila i NVO Fondacija lokalne demokratije, te iz Srbije Pokret gorana Sremske Mitrovice i Institut za zaštitu prirode.

Ukupna vrijednost implementacije projekta u BiH i Srbiji bila je 218.000 €, od čega je oko 93.370,00 € utrošeno za njegovu realizaciju u BiH. Ministarstvo je također sufinansiralo ovaj projekat sa oko 15.312 €, a implementacija istog je u KS obuhvatila ZP "Bijambare". U okviru projekta urađena je studija isplativosti i izvodivosti formiranja Eko kampa.

9. Jačanje kapaciteta za upravljanje područjima od izuzetne prirodne vrijednosti (2010.-2012. godine)

Cilj Projekta bio je izgradnja kapaciteta zemalja Zapadnog Balkana za održivo upravljanje i korištenje prirodnih područja u funkciji razvoja ekoturizma, a isti se paralelno realizovao na SP "Vrelo Bosne", gornjem toku rijeke Dretulje u gradu Plaški u Hrvatskoj i planini Ljubišnja u Opštini Pljevlje u Crnoj Gori. Partneri u realizaciji ovog projekta su bili NVO "Centar za okolišni razvoj Sarajevo", Park prirode "Logarska dolina" (Slovenija), Ekološka udruga "Kako je zelena moja dolina" Plaški (Hrvatska) i "Fondacija za razvoj sjevera Crne Gore" Pljevlja (Crna Gora). Za realizaciju pomenutih ciljeva SP "Vrelo Bosne" prepoznato je kao mjesto od izuzetne prirodne vrijednosti, prije svega kao vodni resurs za KS, ali i područje na kome bi se uz edukaciju uposlenika i saradnju sa lokalnim stanovništvom mogle realizirati i aktivnosti u pogledu razvoja ekoturizma. S tim u vezi, u okviru projekta, između ostalog, održano je više stručnih radionica, edukacije menadžera, zaposlenika KJU za zaštićena prirodna područja i rendžerskih službi, te ostvarivanje saradnje sa lokalnim stanovništvom na izradi autentičnih proizvoda, koji su se nudili posjetiteljima zaštićenih prirodnih područja. Ukupna vrijednost projekta iznosila je 191.117,00 €, a za njegovu realizaciju Evropska komisija osigurala je 80% sredstava, dok je 20% sredstava obezbijeđeno od strane ovog Ministarstva, te općine Pljevlja i Plaški.

10. Razvoj održivih praksi za zaštitu, promociju i upravljanje prirodnim resursima (2010.-2012. godine)

Projekat je odobren u okviru IPA prekogranične saradnje BiH i Crne Gore, ukupne vrijednosti oko 170.000,00 €, od čega je 85% odobreno od strane Evropske unije i to sredstvima iz Instrumenta pretpristupne pomoći (IPA 2008), a od toga se 90.000,00 € odnosilo na projekte u našoj državi. Partner i sufinansijer projekta u Bosni i Hercegovini je bilo Ministarstvo prostornog uređenja i zaštite okoliša Kantona Sarajevo (sa iznosom od 25.000,00 KM), a u Crnoj Gori Turistička organizacija Pljevlja. Implementator projekta bio je Centar za okolišno održivi razvoj iz Bosne i Hercegovine u partnerstvu sa Opštinom Pljevlja iz Crne Gore. Glavni cilj projekta bio je doprinos zaštiti, promoviranju i unapređenju efikasnog upravljanja područjima od izuzetne prirodne vrijednosti (PIPV područja) s ciljem razvoja turizma i drugih alternativnih ekonomskih aktivnosti u svrhu očuvanja prirodnih resursa, a isti se u BiH odnosio na područja Skakavca, Bijambara i Vrela Bosne, dok u Crnoj Gori na područje planine Ljubišnja.



11. Deminiranje Zaštićenog pejzaža "Bijambare" (2011. godina)

U cilju realizacije Projekta Ministarstvo je sa Međunarodnim fondom za deminiranje i pomoć žrtvama mina (ITF) iz Republike Slovenije 2011. godine potpisalo Memorandum o udruživanju sredstava za deminiranje oko 130.000 m² miniranih površina ZP "Bijambare". Potpisivanjem ovog memoranduma osigurano je 400.000,00 KM, od 150.000,00 KM od strane Međunarodnog fonda, 150.000,00 KM je obezbijedilo Ministarstvo, a u ukupan iznos ubrojana su i ranije neiskorištena sredstva od 100.000,00 KM. Aktivnosti deminiranja su se izvodile na proširenom obuhvatu zaštićenog područja određenog Prostornim planom područja posebnih obilježja ZP "Bijambare", koga je Skupština KS usvojila 2009. godine.

12. Održivo upravljanje i promocija turizma prirodne i arheološke baštine" - Adriaticaves (projekat odobren krajem 2017. godine, početak realizacije 2018. godine)

Projekat je odobren u okviru Programa prekogranične saradnje za područje jadransko – jonske regije „The Adriatic ionian Programme – ADRION“ u iznosu od 229.099,589 KM. Korisnik sredstava i implementator Projekta je Kantonalna javna ustanova za zaštićena prirodna područja, dok je Ministarstvo pridruženi partner. Projekat se odnosi na održivu promociju i upravljanje prirodnim i arheološkom baštinom speleoloških objekata, pa je shodno tome planirano da se implementacija projekta odvija na području Zaštićenog pejzaža "Bijambare", u okviru kojeg bi se na ovom prostoru razvio novi koncept turističke ponude u segmentu speleoturizma. Projekat bi se trebao realizovati do 2020. godine.

13. "Eco Karst-usluge ekosistema zaštićenih područja u kršu - pokretačka snaga lokalnog razvoja" (realizacija projekta počela 2017. godine)

Projekat je u fazi realizacije, a cilj je doprinos zaštiti i održivom razvoju kraških biokoridora na osnovu njihove vrijednosti usluga ekosistema. Projekat je odobren 2017. godine u okviru Dunavskog transnacionalnog programa "Interreg Danube" u vrijednosti od 219.052,96 KM, te se realizuje na području Zaštićenog pejzaža „Bijambare“. Kantonalna javna ustanova za zaštićena prirodna područja je implementator i korisnik odobrenih sredstava, dok je Ministarstvo u funkciji pridruženog partnera.

14. Projekat "Zeleni ekonomski razvoj" (od novembra 2015. godine do danas)

Projekat "Zeleni ekonomski razvoj" se u Kantonu Sarajevo realizuje u saradnji sa UNDP-ijem i Vladom Švedske, putem koje su od početka implementacije odobrena bespovratna sredstva u iznosu od 1.110.000,00 KM. Sredstva su u najvećoj mjeri utrošena za realizaciju projekata povećanja energetske efikasnosti u objektima budžetskih korisnika u KS (javni objekti iz sektora zdravstva, obrazovanja, kulture, rada i socijalne politike i sl.). Kanton Sarajevo je putem ovog Ministarstva u istom periodu i za iste namjene izdvojio sredstva u iznosu od preko 2.6 miliona KM. Projekat se realizuje s ciljem najprije smanjenja negativnih efekata na kvalitet zraka uslijed proizvodnje toplotne energije, zatim racionalizacije troškova za potrošnju energije, uštede budžetskih sredstava, mogućnosti apliciranja prema različitim međunarodnim fondovima, te stimulisanja otvaranja novih "zelenih radnih mjesta" u okviru energetske obnove objekata.

Ono što je bitno istaći, da je u toku 2017. godine naše Ministarstvo u funkciji pridruženog partnera zajedno sa Zavodom za planiranje razvoja KS apliciralo za sredstva CEI fonda u okviru EBRD-a (KEP Italy) sa Projektom "Smjernice i preporuke za održivo prostorno planiranje, izgradnju i zaštitu okoliša u Kantonu Sarajevo", ali isti nažalost nije odobren. S druge strane, u toku je priprema projekta iz oblasti zaštite zraka sa kojim će Ministarstvo aplicirati na posebni Program



EU pod nazivom "Evropa za građane", a ubrzo se očekuju i rezultati projekta vezano za poticanje obnove i upravljanja ekološkim koridorima u ZP "Bentbaša", s kojim je aplicirano na Dunavski transnacionalni program "Interreg Danube".

Kada je u pitanju spisak imena članova tima koji radi na pripremi projekata iz KEAP-a usvojenog 31.10.2017. za narednih pet godina, a u svrhu povlačenja bespovratnih sredstava uz pomoć kojih će KEAP biti implementiran, ističemo da Ministarstvo ove aktivnosti radi u okviru svojih relativno skromnih kadrovskih kapaciteta i resursa (ne postoje konkretno uposlenici koji rade samo na tim poslovima), ali u saradnji sa drugim nivoima vlasti, kantonalnim zavodima, komunalnim preduzećima i ustanovama, različitim nevladinim organizacijama i dr. Dakle, nisu angažovani nikakvi posebni članovi niti timovi koji rade konkretno na pripremi projekata iz KEAP-a. Ono što je trenutno aktuelno jest priprema rješenja o imenovanju Koordinacionog odbora za provođenje Kantonalnog plana, kome će osnovna funkcija biti praćenje realizacije mjera i aktivnosti koje su utvrđene u KEAP-u.

Inače, u akcionim planovima kao sastavnim dijelovima KEAP-a definisane su mjere i aktivnosti čija je realizacija odgovornost svih utvrđenih nosilaca, kako je to definisano Odlukom o donošenju Kantonalnog plana zaštite okoliša KS ("Službene novine KS" broj 47/17), naravno u saradnji sa ovim Ministarstvom.

S poštovanjem,

MINISTAR

Čedomir Lukić, dipl.ing.arh.

Pripremila: Amela Rokša, stručni savjetnik

Kontrolisala: Zijada Krvavac, pomoćnik ministra za zaštitu okoliša

Dostaviti:

- Naslov
- Stručna služba Vlade Kantona Sarajevo, ovdje (na znanje)
- Evidencija
- a/a

